

Confeugo 2015

Sciô Scindico,

l'anno pasòu ò comensòu a parlâ con l'aregordâ a Republica de Zena e a seu classe dirigente. Gente carega de dinæ, coscì tanti che, fòscia, no riescimmo manco a rendise conto de quanti n'aivan. Eben, quelle ricche famigge, fæte d'òmmi de grande valô, investivan i seu goagni inta seu patria: chi, a Zena. An fæto bella Zena con di palassi mâvegiozi e l'an reiza ricca e, se sa, quande e palanche son tante e fregogge son palanche! Pe quelli tenpi an fæto ascì inponenti òpere de solidarietæ e de ascistenza. Penso a l'Abergo di Pövei, ma anche a-o fæto che chi a Zena mai nisciun l'é stæto lasciòu moî de famme.

Zena capitale a l'ea scinn-a in graddo de dâ travaggio quande inte campagne e inte l'entrotæra gh'ea carestia e e gente vegnivan a çercâ solevo in çitæ.

Anche ancheu zeneixi careghi de palanche ghe n'é tanti, solo che no investan ciù a Zena.

E chi porieiva fane tiâ sciù torna a testa, o lascia che sta çitæ a meue cian cianin.

Pe questo, sciô scindico, pe primma cösa ghe domando cöse se peu fâ pe fâ tornâ Zena 'n'òcaxon d'investimento, pe fâla tornâ a luxî, inportante e ricca comm'a l'ea ancon inti anni Çinquanta e Sciuscianta do Neuveçento.

Ma se m'amio in gio ancheu gh'é o luvego, no o sô. Pigemose prezenpio a Fea do Mâ, 'na vedrinn-a pe Zena. E òua? Se o pòsto per l'espoixion o saiâ pöco, o Salon Naotico o l'arestiâ a Zena? E quande se faiâ a pròscima Eoroflôra (e mi spero pròpio ch'a se fasse)? E l'IIT o l'arestiâ a Zena ò o se n'andiâ a Milan? Tenpi fa se diva questo antigo proverbio: "Se Zena a l'avesse a cianua de Milan ne faieiva 'na seportua". Ma ancheu? Cöse l'é successo pe ese a sti ponti?

Finia l'industria (perché pâ pròpio ch'a segge finia, n'é vea?) l'é scortio feua l'idea de Zena çitæ turistica, comme se sente tante vòtte dî. Ma niatri zeneixi gh'aviemo di vantaggi? Ecco cöse pensemmo. De seguio gh'emmo træ ecelense che sciòrtan feua da-i confin da çitæ: l'Acquâio, Paxo e o Galata Muzeo do Mâ. Ecelense sci, ma no poemo continuoâ a contâ solo in sce queste. Do resto no me pâ che e tantiscime prezense a-a fin di conti contriboiscian a rende ciù vivibile e bello o nòstro centro stòrico. L'inprescion che s'à a l'é che, finia a vixita, 'n'eugiâ da-a lontan e via a caza a-a spedia! E o l'é 'n fæto che i zeneixi (veuggio dî i ciù tanti) aggian renonçiòu a anâ inte çerti quartê, inte çerte stradde. Mi m'aregòrdo o caroggio de Pre pin de biteghe zeneixi che l'ea 'n piâxei caminâghe. Òua no m'incallo ciù d'anaghe. E pöi, scià me digghe 'n pö voscià se o l'é 'n mòddo d'atirâ i turtisti avei i parcheggi a doî euri e mezo: çinquemia lie de 'na vòtta!

Ancon: se fa i travaggi pe mette in seguessa o Bezagno: cösa de seguio inportante. Ma perché levâ quelle belle prie ch'e delimitavan o marciapê e sostitoile con di "angæxi" de ciumento? Sciâ ne confòrte: e prie, quelle belle, saian rimesse a-o seu pòsto?

Ma 'na matin, e questo devo dîlo in concluxon, me s'é avertò o cheu: i òperai ean li a dâ recatto a-a ræ incioâ a-e miage de Corso Ourelio Saffi, ch'a l'ea rotta no sò ciù da quant'anni! L'ò visciuo comme in segnale de cangiamento, de 'na voentæ de voei fâ tornâ Zena bella, òrdinâ, pulita, 'na çitæ dove se ghe sta coscì ben da ese òrgoliozi de staghe. Ma l'é pròpio coscì, sciô Scindico, ò l'é solo in seunno de 'n matin scentòu a-o tramonto?

Tanti ouguri e scignoria a Voscià e a tutti. Pe Zena e pe San Zorzo!

Franco Bampi
Presidente de A Compagna